

柳河東文集

方

河東先生文集卷六

啟

上廣州趙宗儒尚書啟

某啟。某天罰深重。餘息苟存。沉竄埃罪。朝不圖夕。伏謁無路。不任荒戀之誠。伏念宗元初授御史之日。尚書與杜司空先賜臨顧。光耀里閭。下情至今。尚增惶惕。頃以黨與進退。投竄零陵。囚繫所迫。不得歸奉松楸。哀荒窮毒。人理所極。親故遺忘。況於他人。朝夕之急。饘粥難繼。宗祀所重。不敢死亡。偷視累息。已逾數月。伏以尚書德量弘納。義風遠揚。收撫之恩。始於枯朽。敢以餘喘上累深仁。伏惟惻然見哀。使得存濟。悽悽荒懇。叩顙南望。竊以動心於無情之地。施惠於不報之人。古烈尚難。況在今日。而率然干冒。決不自疑者。蓋以聞風之日久。嚮德之誠至。振高義於流俗之外。合大度於古人之中。獨有望於閣下而已。非敢以尋常祈向之禮。當大賢匍匐之仁。夙夜忖度。果於自卜。方在困辱。不敢多言。伏紙惶恐。不勝戰越。謹啟。

上西川武元衡相公謝撫問啟

某啟。某愚陋狂簡。不知周防。失於夷途。陷在大罪。伏匿嶺下。于今七年。追念往愆。寒心飛魄。幸蒙在宥。得自循省。豈敢徹聞於廊廟之上。見志於樽俎之際。以求心於萬

一者哉。相公以含弘光大之德。廣博淵泉之量。不遺垢污。先賜榮示。奉讀流涕。以懼以悲。屏營舞躍。不敢寧處。是將收孟明於三敗。責曹沫於一舉。俾折脅。臄脚。之倫。得自拂飾。以期效命於鞭策之下。此誠大君子並容廣覽。棄瑕錄用之道也。自顧孱鈍。無以克堪。祇受大賜。豈任負戴。精誠之至。炯然如日。拜伏無路。不勝惶惕。輕冒威重。戰汗交深。

謝襄陽李夷簡尚書撫問啟

某啟。當州員外司馬李幼清。傳示尚書委曲。特賜記憶。過蒙存問。捧讀喜懼。浪然涕流。慶幸之深。出自望外。伏惟尚書鶚立朝端。風行天下。入統邦憲。出分主憂。控此上游。式是南服。凡海內奔走之士。思欲修容於轅門之外。躡履於油幢之前。譬之涉蓬瀛。登崑閬。不可得而進也。某負罪淪伏。聲銷跡滅。固世俗之所棄。親友之所遺。敢希大賢曲見存念。是以展轉歛衄。晝詠宵興。願為廝役。以報恩遇。瞻仰霄漢。邈焉無由。網羅未解。縱羽翼而何施。囊檻方堅。雖虎豹其焉往。不任踊躍懇戀之至。謹奉啟起居。輕黷威嚴。倍增戰越。

賀趙江陵宗儒辟符載啟

某啟。伏聞以武都符載為記室。天下立志之士。雖然相顧。繼以歎息。知為善者得其

歸嚮流言者有所間執直道之所行義風之所揚堂堂焉實在荆山之南矣幸甚幸甚夫以符君之藝術志氣為時聞人才位未會盤桓固久中間因緣陷在危邦與時偃仰不廢其道而為見忌嫉者橫致唇吻房給事以高節特立明之於朝王吏部以清議自任辨之於外然猶小人浮議困在交戟凡諸侯之欲得符君者城聯壤接而惑於騰沸環視相讓莫敢先舉及受署之日則皆開口垂臂悵望悼悔譬之求珠於海而徑寸先得則眾皆快然快字恐快字之訛然無本可據罷去知奇寶之有所歸也嗚呼巧言難明下流多訕自非大君子出世之氣則何望焉瞻望清風若在天外無任感激欣躍之至輕瀆陳賀不勝戰越不宣

謝李中丞啟安撫崔簡

某啟伏見四月六日敕刺史崔簡以前任賊罪決一百長流驪州伏奉去月二十三
日牒崔簡家口牒州安存並借官宅什器差人與驅使伏惟中丞以直清去敗政以
惻隱撫窮人罪跡暴著則按之以至公家屬流離則施之以大惠各由其道咸適于
中威懷並行仁義齊立繩愆糾繆列郡肅澄清之風匡困資無闔境知噢咻之德凡
在巡屬慶懼交深伏見崔簡兒女十人皆柳氏之出簡之所犯首末知之蓋以風毒
所加漸成狂易不知畏法坐自抵刑名為贓賄卒無儲蓄得罪之日百口熬然叫號

羸頓不知所赴儻非至仁厚德深加憫恤則流散轉死期在須臾某幸被縲囚久沐恩造至於骨肉又荷哀矜循念始終感懼無地謹勒祇承人沈澹奉啟陳謝下情輕瀆

上湖南李中丞啟

某啟某嘗讀列子書有言於鄭子陽者曰列禦寇蓋有道之士也居君之地而窮君不好士使之然乎子陽於是以君命輸粟於列子列子不受固常高其志又讀孟子書言諸侯之於士曰使之窮於吾地則賙之賙之亦可受也又怪孟子以希聖之才命代而出不卓然自異以潔白其德取食於諸侯不以為非斷而言之則列子獨任之士唯已一毛之為憂故遁以自免孟子兼濟之士唯利萬物之為謀故當而不辭今宗元處則無列子之道出則無孟子之謀窮則去讓而自求至則捧受而無慚斯固為貪凌苟冒人矣董生曰明明求財利惟恐困乏者庶人之事也是皆詬耻之大者而無所避之何也以為士則黜辱為農則斥遠無伎不可以為工無資不可以為商抱大罪處窮微以當惡歲而無廩食又不自列於閭下則非所以待君子之意也伏惟覽子陽孟子之說以垂德惠無使惶惶然控於他邦重為董生所笑則縲囚之幸大矣

上桂州李中丞薦盧遵啟

凡士之當顯寵貴劇則其受賜於人也無德心焉何也彼將曰吾勢能得之是其所出者大而其報也必細居窮厄困辱則感慨捧戴萬萬有加焉是其所出者小而其報也必巨審矣故凡明智之君子務其巨以遺其細則功業光乎當時聲名流乎無窮其所以激之於中者異也若宗元者可謂窮厄困辱者矣世皆背去顙顙曠野獨賴大君子以明智垂仁問訊如平生光耀囚錮若被文繡嗚呼世之知知足者鮮矣既受厚遇則又有不已之求以黷閣下之嚴威然而亦欲出其感槩捧戴而效其巨者伏惟閣下留意裁擇幸甚幸甚伏以外族積德儒厚以為家風周齊之間兄弟三人咸為帝者師孝仁之譽高於他門伯舅叔仲咸以孝德通于鬼神為文士所紀述相國彭城公嘗號於天下名其孝以求其類則其後咸宜碩大光寵以充神明之心今乃彫喪淪落莫有達者豈與善之道無可取耶獨內弟盧遵其行類諸父靜專溫雅好禮而信飾以文墨達于政事今所以聞於閣下者無忤於心無愧於色焉以宗元棄逐枯槁故不求遠仕務顯名而又難乎其進也竊高閣下之舉賢容眾故願委心焉則施澤於遵過於厚賜小人也遠矣以今日之形勢而不廢其言使遵也有籍名於天官獲錄食以奉養用成其志一舉而有知恩之士二焉可不謂務其巨者乎伏惟試詳擇焉言而無實罪其敢逃進退恐懼不知所裁不宣謹啟

啟

上大理崔大卿應制舉啟

古之知己者。不待來求而後施德。舉能而已。其受德者。不待成身而後拜賜。感知而已。故不叩而響。不介而合。則其舉必至。而其感亦甚。斯道遁去。遼濶千祀。何為乎今之世哉。若宗元者。智不能經大務。斷大事。非有恢傑之才。學不能探奧義。窮章句。為腐爛之儒。雖或實力於文學。勤勤懇懇于歲時。然而未能極聖人之規矩。恢作者之聞見。勞費翰墨。徒爾拖逢掖曳大帶。游於朋齒。且有愧色。豈有能乎哉。閣下何見待之厚也。始者自謂抱無用之文。戴不肖之容。雖振身泥塵。仰睇雲霄。何由而能哉。遂用收視內顧。頽首絕望。甘以沒沒也。今者果不自意。他日瑣瑣之著述。幸得流於衽席。接在視聽。閣下乃謂可以蹈遠大之途。及制作之門。決然而不疑。介然而獨德。是何收採之特達。而顧念之勤備乎。且閣下知其為人。何如哉。其貌之美陋。質之細大。心之賢不肖。閣下固未知也。而一遇文字。志在濟拔。斯蓋古之知己者。已故曰。古之知己者。不待來求而後施德者也。然則亟來而求者。誠下科也。宗元向以應博學宏詞之舉。會閣下辱臨考第。司其升降。當此之時。意謂運合事并。適丁厥時。其私心日以自負也。無何。閣下以鯢鱗之勢。不容尺澤。悠爾而自放。廓然而高邁。其不我知者。

遂排逐而委之。委之誠當也。使古之知己猶在。豈若是求多乎哉。夫仕進之路。昔者竊聞乎師矣。太上有專達之能。乘時得君。不由乎表著之列。而取將相。行其政焉。其次有文行之美。積能累榮。不由乎舉甲乙。歷科第。登乎表著之列。顯其名焉。又其次則曰。吾未嘗舉甲乙也。未嘗歷科第也。彼朝庭之位。吾何修而可以登之乎。必求舉是科也。然後得而登之。其下不能知其利。又不能務其往。則曰。舉天下而好之。吾何為獨不然。由是觀之。有愛錐刀者。以舉是科為悅者也。有爭尋常者。以登乎朝廷為悅者也。有慕權貴之位者。以將相為悅者也。有樂行其政者。以理天下為悅者也。然則舉甲乙。歷科第。固為末而已矣。得之不加榮。喪之不加憂。苟成其名於遠大者。何補焉。然而至於感知之道。則細大一矣。成敗亦一矣。故曰。其受德者。不待成身而後拜賜。然則幸成其身者。固末節也。蓋不知來求之下者。不足以收特達之士。而不知成身之末者。不足以承賢達之遇。審矣。伏以閤下德足以儀世。才足以輔聖。文足以當宗師之位。學足以冠儒術之首。誠為賢達之表也。顧視下輩。豈容易而收哉。而宗元樸野昧劣。進不知退。不可以言乎德。不能植志於義。而必以文字求達。不可以言乎才。秉翰執簡。敗北而歸。不可以言乎文。登場應對。刺繆經旨。不可以言乎學。固非特達之器也。忖省陋質。豈容易而承之哉。叨冒大遇。穢累高鑒。喜懼交爭。不克寧居。竊感

荀瑩如實出己之德敢希豫讓國士遇我之報伏候門屏敢俟招納謹奉啟以代投刺之禮伏惟以知己之道終撫薦焉不宣宗元謹啟

上裴晉公度獻唐雅詩啟

宗元啟伏以周漢二宣中興之業歌於大雅載在史官然而申甫作輔方召專淮夷之功魏邴謀蕃辛趙致罕音羌之續文武所注中外莫同伏惟相公天授皇家聖賢克合謀叶德一以致太平入有申甫魏邴之勤出兼方召辛趙之事東取淮右北服恒陽恒陽指王承宗畧不代出功無與讓故天下文士皆願秉筆牘勤思慮以贊述洪烈闡揚大勲宗元雖敗辱斥逐守在蠻裔猶欲振發枯槁決疏潢汙罄效蚩鄙少佐毫髮謹撰平淮夷雅二篇恐懼不敢進獻私願徹聲聞于下執事庶宥罪戾以明其心出位僭言惶戰交積無任踴躍屏營之至不宣宗元謹啟

上襄陽李僕射愬獻唐雅詩啟

宗元啟昔周宣中興得賢臣召虎師出江漢以平淮夷故其詩曰江漢之潏王命召虎其卒章曰于周受命自召祖命以明虎者召公之孫克承其先也今天子中興而得閭下亦出江漢以平淮夷克承于先西平王其事正類然而未有嗣大雅之說以布天下以施後代豈聖唐之文雅獨後於周室哉宗元身雖陷敗而其論著往往不

為世屈意者殆不可自薄自匿以墜斯時苟有輔萬分之一雖死無憾謹撰平淮夷雅二篇齋沐上獻誠醜言淫聲不足以當金石庶繼代洪烈裨官里人得採而歌之不勝憤踴之至輕瀆威重戰越交深謹啟

上揚州李吉甫相公獻所著文啟

宗元啟始閣下為尚書郎薦寵下輩士之顯於門閥者以十數而某尚幼不得與於斯役及閣下遭讒姤在外十餘年又不得效薄伎於前以希一字之褒貶公道之行也閣下乃始為贊書訓辭擅文雅於朝以宗天下而某又以此時去表著之位受放逐之罰荐仍囚錮視日請命進退違背思欲一日伏在門下而不可得常恐抱斯志以沒卒無以知於門下冥冥長懷魂魄幽憤故敢及其能言貢書編文冒昧嚴威以畢其志伏惟觀覽焉幸甚幸甚閣下相天子致太平用之郊報則天神降地祇出用之經邦則百貨殖萬物成用之文教則經術興行用之武事則暴亂剪滅依倚而冒榮者盡去幽隱而懷道者畢出然後中分主憂以臨東諸侯而天下無患盛德大業光明如此而又有周公接下之道斯宗元所以廢錮瀆死而猶欲致其志焉閣下倘以一言而揚舉之則畢命荒裔固不恨矣謹以雜文十首上獻縲囚而干丞相大罪也寧為有聞而死不為無聞而生去就乖野不勝大懼謹啟

謝李吉甫相公示手札啟

宗元啟。六月二十九日。衡州刺史呂溫道過永州。辱示相公手札。省錄狂瞽。收撫羈縲。沐以含弘之仁。忘其進越之罪。感深益懼。喜極增悲。五情交戰。不知所措。宗元質性庸塞。行能無取。著書每成於廢疾。進德且乏其馨香。常願操篲。醫門。掬溜蘭室。良辰不與風志多違。昨者踴躍殘魂。奮揚蓄念。激以死灰之氣。陳其弊帚之詞。致之烟霄。分絕流眄。今則垂露在手。清風入懷。華袞濫裒於赭衣。龍門俯收於埴井。藻鏡洞開。而秋毫在照。文律傍暢。而寒谷生輝。化幽鬱之志。若覲清明。換兢危之心。如承撫薦。非常之幸。豈獨此生。伏以淮海劇九天之遙。瀟湘參百越之俗。傾心積念。長懸星漢之上。流形委骨。永淪魑魅之羣。何以報恩。唯當結草。無任喜懼感戀之至。

上李中丞

即湖南李中丞

所著文啟

宗元啟。宗元無異能。獨好為文章。始用此以進。終用此以退。今者畏罪悔咎。伏匿惴慄。猶未能去之。時時舉首。長吟哀歌。舒泄幽鬱。因取筆以書。紉韋而編。畧成數卷。伏念閭下。以文章昇大僚。統方隅。而宗元幸緣罪辜。得與編人齒於部內。不以此時露其所為。以希大君子。顧視則為陋劣。而自棄也。敢飾近文。及在京師。官命所草者。凡三卷。合四十三首。不敢繁故也。倘或以為有可采者。當繕錄其餘。以增几席之污。去

就鄙野。伏用兢惶謹啟

表

柳州賀冊尊號表

臣某伏奉日月制。陛下膺受尊號。率土臣子。慶抃無窮。臣聞立極之大。四海無以報神功。配天之尊。萬物不能崇聖德。唯有徽號。是彰中興。所以探天心。下極人欲。伏惟元和聖文神武法天應道皇帝陛下。統承千載。光被六幽。蠱賊盡除。福應皆集。有首有趾。咸識太平。勲臣增爵錄之榮。戎士加賞延之寵。片善必錄。微功盡昇。獨惟聖謨。事絕酬答。萬國缺望。百工怨思。是以啟元和之盛典。延昊穹之景祚。理歷凝命。實曰聖文。和衆定功。時惟神武。運行有法。天之用。變化乃應。道之方。鬼神協謀。夷夏同志。大禮既建。鴻恩遂行。歡呼遠布。於九圍。滲漉普周。於八裔。慶超邃古。美冠將來。臣獲守蠻荒。遠承大典。潢污比陋。河清幸遂。於千年塵壤。均微山呼。願同於萬歲。無任慶賀屏營之至。

禮部賀甘露表

臣某言。中使王自寧至。伏奉宣聖旨。出延和殿前。丁香樹甘露一大合。示宰臣。未時又出一大合。令明日示百寮。甘露見降未止者。玄化升聞。靈貺昭答。必呈尤異之應。

以告天地之和。臣某誠歡誠慶。頓首頓首。伏惟皇帝陛下。均煦育之功。敷滂漉之澤。太和潛達。闕瑞克彰。發於天霄。特降宮樹。朝光初燭。方湛湛而不晞。畏景轉炎。更瀼瀼而未已。綴葉而珠璣。積耀盈器。而冰玉呈姿。芳襲椒蘭。味兼飴醴。然則零於庭而著異紀於年。以標奇。徒於往辰。孰並茲日。况樹有丁香之珍。殿即延和之號。所以著芳風之遠播。期聖壽於無疆。事絕古今。慶傳遐邇。臣謬承渥澤。獲覩殊祥。抃躍之誠。倍萬恒品。

為王京兆賀雨表

臣某言。臣昨日面奉進旨。以近日少雨。今月內無雨。即須祈禱。今日便降甘雨者。天且不違神。必有據密雲與綸言。繼發時雨。將天澤並流。臣某誠歡誠慶。頓首頓首。伏惟皇帝陛下。憂切蒸黎。慮深稼穡。思彼未兆。防於無形。滲漉每出於湛恩。變化必隨於廣運。宸衷暫惕。已矯御天之龍。聖謨既宣。遂洽漏泉之澤。靈霽靈徒感切霽音隊黑雲也周布。霏微四施。黍稷盡成。公私皆及。野夫鼓舞。知帝力之玄通。官吏歡呼。見天心之默喻。臣某牧人京邑。動仰皇靈。渥澤徒加。涓滴無助。無任感悅屏營之至。

王京兆賀雨表

臣某言。今月十三日。面奉進旨。緣自春來少雨。宜即差官精誠祈禱者。十四日。臣便

差官分赴靈跡。其日雲陰四合。至十五日。甘雨遂降。伏惟皇帝陛下。言為神化。動合天心。未成早暘之虞。已積憂勤之慮。眾靈受職。蒼蔚且躋。於南山百穀。仰榮滂霈。遂霑於東作。睿謨朝降。膏澤夕周。知天人之已交。識陰陽之不測。然則周王徒勤於方社殷帝。虛美於桑林。豈若無災而早圖。未禱而先應。化超前聖。道貫重玄。徧野同歡。傾都相慶。臣之欣躍。倍萬恒情。

賀親自祈雨有應表

臣某言。臣得上都院官金部員外郎韓述狀報。以時雨未降。親自於龍堂祈禱。有靈禽羣翔。自成行列。如隨威鳳。以翼龍舟。其日降雨者。伏以時或愆陽。歲之常候。式當聖日。無害豐年。陛下敦本務農。憂人閔雨。宸慮所至。天心自通。故得瑞鳥迎舟。掩商羊之舞。僊雲覆水。協從龍之徵。初泛灑於上宮。遂滂霈於率土。自中徂外。皆荷生成。雨公及私。靡不碩茂。殷后徒勤於自翦。周公空媿於舞雩。臣以庸虛。謬司垣翰。有年之慶。惟聖之功。臣某不任云云。

表

為裴中丞賀克東平赦表

臣某言。伏奉月日德音。以淄青蕩平。褒功宥罪。布告遐邇者。臣聞肅殺之後。每致陽

和雷霆既施必聞膏澤伏惟陛下體乾剛以運行叶坤元之翕闢百靈受職六合從風阻兵怙亂者必就梟擒懷忠抱義者無不甄錄激其效順特加旌節之榮寵以元功遂兼鼎鉉之任戎行音窮賞賚之重死事極褒卹之優劫脇之役盡除聚斂之名皆去傷痍受煦老疾加恩豐財已復其征徭賜種更盈於種陸嚴山川之祀神必有依申義烈之家物無不感周王推忠厚之化漢帝慙愷悌之風太平之德斯為至盛然則虞巡可復告成將慶於岱宗漢典方行講禮再榮於闕里臣謬膺重寄獲覩大和抃蹈之誠倍萬恒品謹已施行郡邑宣示軍戎莫不動地歡呼若醉千鍾之酒騰天鼓舞如聞九奏之音無任慶賀踴躍之至

註釋克東平

元和十四年淄青兵馬使劉悟斬李師道以降元功田弘正與討師道山東十二州悉平以悟為義成節度使赦天下加司徒平章事

柳州賀破東平表

臣某言即日被觀察使牒李師道以月日克就梟戮者帝德廣運唐命惟新靈壇廓清天地貞觀率土臣庶慶抃無涯伏惟睿文聖武皇帝陛下威使百神德消六沴天降寶運時歸太平自克夏擒吳翦蜀平蔡殊類稽顙羣疑革心唯此兇妖尚聞悖慢庭議既得廟謀必臧旌旗燭耀於洪河金鼓震驚於靈岳鄆城自潰寧同莒魯之爭齊地悉平無俟耿陳之戰五兵永戢七德無虧含生比堯舜之仁率土陋成康之俗

介丘霧息已望翠華之來沂水風生更起舞雩之詠千歲之統實在於斯臣守在蠻荒獲承大慶抃躍之至倍萬常情

代裴中丞賀分淄青為三道節度表

臣某言伏見某月日制分淄青諸州為三道節度都團練觀察等使者蚺豕之穴忽為樂郊氛沴之餘盡成和氣伏惟皇帝陛下天付昌期神開寶曆復昇平之土宇拔祆孽之根源自西自東不違於指顧我疆我理咸得其區分山川備臨制之形道塗適征徭之便俾侯既定賜履以靈異青兗之封爰從古制解曹衛之地實契雅謀車甲永藏馬牛勿用俗被雍熙之化代知仁壽之期農事載盛於耨芟儒風重興於俎豆足使季札觀魯更陳南籥之儀山甫徂齊復正東方之賦臣總戎遠地不獲陪賀闕庭云云

為韋侍郎賀布衣竇羣除右拾遺表

臣某伏見今月日制除布衣竇羣右拾遺者臣聞直道之行四方嚮德逸人是舉天下歸心臣伏以竇群肥遯居貞包蒙養正學術精果操行堅明讚詠道真以求其志頃守藩服特所委知及歸朝廷輒有聞薦庶逃竊位之責以塞曠官之尤豈謂天聽曲從瞽言無廢况諫諍之職政化是參擢於布衣久無其比周行慶抃林藪震驚晦

跡寧慮於遺賢懷才盡思於展效臣以性本庸疎動無裨益唯思進拔以報恩榮區區懇誠實貫金石言而不廢微臣敢竊於薦雄德必有鄰聖代式光於尊隗自蒙受命冀復面陳迫以疾病接於休假注心蓄念寤寐兢惶無任喜躍屏營之至

註釋

韋侍郎處實羣

詳見韓文

代裴中丞謝討黃少卿賊表

臣某云云卽日奉事官米蘭迴伏奉手詔云云者臣聞膚革既平雖疥癬而必去豺狼已斃在狐鼠而宜除臣某中謝伏惟元和聖文神武法天應道皇帝陛下受命上玄底寧下土兇渠盡殄威武載揚蠢爾腥膻尚聞凌暴靈旗斜指銅獸俯臨三軍知必勝之方萬姓喜永清之路微臣忝司戎律親列顏行躡伏波之舊規乘下瀨之故事盡瘁事國期畢命於戈矛不宿於家思奮身于原野卽以今日某時出師就道便披榛蹶石摩壘陷堅蕩清海隅永息邊徼切以才非充國敢自贊於無踰志慕孟公庶追蹤於不伐謬承重委寤寐兢惶無任感恩隕越之至

為崔中丞請朝覲表

臣歷刺三州連總二府外任逾紀入覲無階就日望雲魂飛心注伏惟睿聖文武皇帝陛下覆載無私遐邇同致復昇平之故事繼前聖之高蹤中外踐更出入迭用臣